





唐詩紀事卷第三十二

崔琮

李竦

裴逵

于尹躬

顏粲

葉季良

陳通方

嚴公弼

楊炎

元季川

蔣渙

包何

劉商

胡笳十八拍

孫海

崔琮

長至日上公獻壽詩云應曆三陽首朝天萬國同斗邊  
看子月臺上候祥風五夜鐘初曉千門日正融玉堦文  
物盛仙仗武貌雄率舞皆群辟稱觴即上公南山為聖  
壽長對未央宮



琮登大曆二年進士第

李竦

長至日上公獻壽詩云候曉金門闢乘時寶曆長羽儀  
瞻上宰雲物麗初陽漢禮方傳佩堯年正捧觴日行臨  
觀闕帝錫洽珪璋盛美超三代洪休降百祥自憐朝不  
坐空此詠無疆

竦登大曆二年進士第官于京師朱泚亂竦與關播盧  
杞皆踰垣走追及帝咸陽

裴逵

南至日太史登臺書雲物詩云圓丘才展禮佳氣近初

分太史新簪筆高臺紀彩雲煙空和縹緲曉色共氛氲  
道泰資賢輔年豐荷聖君恭惟司國瑞兼用察人文應  
念懷鈇客終朝望碧雲

于尹躬

南至日太史登臺書雲物詩云至日行時令登臺約禮  
文官稱伯趙氏色辨五方雲晝漏聽初發陽光望漸分  
用天爲歲備持簡出人羣惠愛周微物生靈荷聖君長  
當有嘉瑞郁郁復紛紛

尹躬大曆進士元和間爲中書舍人坐其弟臯漢以賊  
獲罪左授洋州刺史制云雖無從坐之法合當失教之



賁

顏粲

吳宮教美人戰云有客陳兵畫功成欲霸吳王顏承將  
略金鈿指軍符轉佩風雲暗鳴聲錦繡趨雪花頻落粉  
香汗盡流珠掩笑誰干令嚴刑必用誅至今孫子法猶  
可靜邊隅

粲登建中進士第

葉季良

吳宮教美人詩云強吳務霸畧講武在深宮盡出嬌娥  
奴先觀上將風揮戈羅袖卷擐甲汗粒紅掩笑分旗下

含羞入隊中鼓停行未正刑舉令纔崇自可威鄰國何

勞逞戰功

季良登正元進士第

陳通方

通方金谷園懷古云緩步洛城下軫懷金谷園昔人隨  
水逝舊樹逐春繁冉冉搖風弱菲菲裊露繁歌臺豈易  
見舞袖乍如存戲蝶香中起流鶯暗處宣徒聞施錦帳  
此地擁行軒

通方登貞元進士第王播同年五十六通方甚少因期  
集撫播皆曰王老奉贈一第其言日暮途遠及第同贈



官也播恨之後通方丁家艱辛苦萬狀播捷三科爲正  
郎判鹽運方窮悴求即不甚給之時李虛中爲副使通  
方以詩求而汲引云應念路傍憔悴翼昔年喬木幸同  
遷播不得已薦爲江西院官

公弼

是漢西湖云西湖創置自房公心匠縱橫造化同見說  
爲地推獨步高名何事滯川中

公弼公昭巖震之子震梓州人建中中爲鳳州刺史治  
行爲山南第一封鄖國公公弼襲封

揚炎

流崖州至鬼門關作云一去一萬里千知千不還崖州  
何處在生度鬼門關

元載末年納薛瑤瑤英爲姬處以金絲帳却塵幃衣以龍  
綃衣載以瑤英體輕不勝重衣於異國求此服也唯賈  
至與炎雅與載善往往時見其歌舞至贈詩曰舞怯銖  
衣重笑疑桃臉開方知漢成帝空築避風臺炎贈歌云  
雪面淡眉天上女鳳簫鸞翅欲飛去玉山翹翠步無塵  
楚腰如柳不勝春

炎字公南常袞長詔除炎善德音自開元後言制詔者  
稱常楊元載與炎同郡炎又元出也故擢炎禮部侍郎



德宗時位宰相

元季川

泉上雨後作云風雨蕩繁暑雷息佳霽初衆峯帶雲雨  
清風入我廬颼颼涼颼來臨窺愜所圖綠蘿張新蔓裊  
裊垂坐隅流水復簷下丹砂發清渠養葛爲我衣種芋  
爲我蔬誰是畹與畦彌漫連野蕪

山中曉興云河漢降玄霜昨來節物疏媿無神仙姿亦  
有陰陽俱靈鳥望不見慨然悲高梧華葉隨風揚珍條  
雜榛蕪爲君寒谷令歎息知何如

季川大曆貞元間詩人也一曰季川名融元次山之弟

也次山作處規云季川云糝復不言糝有意乎

糝足之別稱也

蔣渙

和徐侍郎書叢篠韻云中禁夕沉沉幽篁別作林色連  
雞樹近影落鳳池深爲重凌霜節能虛應物心年年承  
雨露長對紫庭陰

渙儀鳳宰相智周之孫與兄列皆進士渙永太初曆鴻  
臚卿日本使嘗遺金帛不納唯取棧一番以貽其副終  
吏部尚書列終尚書左丞

包何

江上田家云近海川原薄人家本自稀黍苗期臘酒霜



葉是寒衣市井誰相識漁樵夜始歸不須騎馬問恐畏  
狎鷗飛

同諸公尋李方真不遇云聞說到揚州吹簫有舊遊人  
來多不見莫是上迷樓

和苗員外寓直中書寄臺中弟云朝列稱多士君家有  
二難貞為臺裏栢芳作省中蘭夜直分曹閱晨趨接武  
歡每憐雙闕下鴈序入駕鸞

闕下芙蓉云一人理國政昇平萬物呈祥助聖明天工  
河從闕下過江南花向殿前生慶雲垂蔭開難落湛露  
為珠滿不傾更對樂懸張宴處歌工欲奏採蓮聲

賦得秤稱送雲孺卿云願以金垂秤因君贈別離鈎懸  
新月吐衡舉衆星隨掌握須平執錙銖必盡知由來按  
分定莫被弄權疑

何字幼嗣融之子也大曆中為起居舍人

劉商

秋夜聽嚴紳巴童唱竹枝歌云巴人遠從荆山客回首  
荆山楚雲隔思歸夜唱竹枝歌庭槐葉落秋風多曲中  
歷歷叙鄉思鄉思綿綿楚詞古身騎吳牛不畏虎手提  
篋笠欺風雨猿啼日暮江岸邊綠葦連山水連天來時  
連天今十五一成新衣已再補鴻鴈南飛報鄰伍在家



歡樂辭家苦天晴露白鐘漏遲淚痕满面看竹枝曲終  
寒竹風裊裊西風落日東風曉

移居深山謝別親故云不食黃精不採薇葛苗為帶草  
為衣孤雲更入深山去人絕音書暗自飛

商高情放游戲為山水水石自張璪敗後惆悵賦詩曰  
苔石蒼蒼臨澗水溪風裊裊動松枝世間唯有張通會  
流向衡陽那得知

商彭城人居長安劉禹錫作高陵令劉仁師遺愛碑云  
武德名臣刑部尚書德威三代孫大曆中詩人商之猶  
子其名重如此商終於檢校禮部郎中汴州觀察判官

銅雀妓云魏主矜娥眉美人美於玉高臺無晝夜  
竟未足盛色如轉圓夕陽落深谷仍令身歿後尚縱平  
生慾紅粉淚縱橫調絃向空屋舉頭君不在唯見西陵  
木玉輦豈再來嬌鬟為誰綠那堪秋風裏更舞陽臺曲  
曲罷情不勝闌干向西哭臺邊坐野草來去甯羅縠况  
復陵寢間雙雙見麋鹿

古意云達曙寢衣冷開門霜露凝風吹昨夜哭一片梳  
前冰

滑州送人先歸云河水冰銷旅鴈飛寒衣未足又春衣  
自憐飄蕩經年客送別千迴獨未歸



孫海

陸餘慶與陳子昂盧減用為方外十友孫海工於五言為賀賓客所賞自省郎典潮州但賦詩自適

題奉國寺云新秋夜何爽露下風轉淒一磬竹窓下千峯花塔西

題龍門寺云窓燈林靄裏門磬水聲中更與龍花會爐煙滿夕風

孫長源有才思嘗為諷刺云忽然一曲稱君心破却中人百家產又云城外平人驅欲盡帳中猶打棗花毬

唐詩紀事卷第三十二

唐詩紀事卷第三十三

李吉甫

武元衡

鄭網

獨孤良弼

獨孤綬

李季何

李應

盧拱

李觀

裴度

韋同則

陳蛻

李吉甫

九日小園獨謠贈門下武相公云小園休沐暇暫與故山期樹杪懸丹棗苔陰落紫梨舞叢新菊徧繞格古藤垂受露紅蘭晚迎霜白薤肥上公留鳳沼冠劔俟清祠應合端居者長慙補衮詩

武元衡



九日致齋禁省和中書李相公云齋沐限中禁家山傳  
勝遊露寒潘省夜木落庾園秋蘭菊回幽步壺觴絕舊  
儔位高天祿閣詞異畔牢愁孤思琴先覺馳暉水共流  
明朝不相見清祀在圓丘

送唐次云都門去馬嘶灞水東流淺青槐驛路長白日  
離晚望望煙景微草色行人遠

早秋西亭宴徐員外詩云鼎鉉辭台坐麾幢領益州曲  
池連月曉橫笛滿城秋有美皇華使曾同白社遊今來  
重相見偏覺艷歌愁

元衡字伯蒼元和二年爲相代高崇文鎮蜀八年召還  
途經百牢關題石洞詩云昔佩兵符去今持相印還天  
光臨井絡春物度巴山鳥道青冥外風泉洞壑間何慙  
班定遠辛苦玉門關

送柳侍御裴起居云沱江水綠波喧鳥去喬柯南浦別  
離處東風蘭麝多長亭春婉婉層漢路蹉跎會有歸朝  
日班超柰老何又云望鄉臺上秦人去學射山中杜臯  
哀落日河橋千騎別春風寂寞旆旌迴

酬嚴司空荆南見寄云金貂再入三公府玉帳連封萬  
戶侯簾捲青山巫峽曉雲凝碧岫渚宮秋劉琨坐嘯風  
清塞謝朓裁詩月滿樓白雪調高歌不得美人南國翠



娥愁

送張諫議赴闕云詔書前日下丹霄頭戴儒冠脫皂貂  
笛怨柳營煙漠漠雲愁江館雨蕭蕭鶴鴻得路爭先翫  
松桂凌霜貴後彫歸去朝端如有問玉關門外老班超

三詩筆莊  
又玄集

元衡善為五言好事者傳之被之管絃嘗夏夜作詩云  
夜久喧暫息池臺惟月明無因駐清景明出事還生明  
日遇害初元和八年元衡自蜀再輔政時太微犯上相  
歷執法占者言今之三相皆不利始輕末重月餘李絳  
以足疾免明年十月李吉甫以暴疾卒至是元衡為盜

所害年五十八始元衡與吉甫齊年又同為宰相及出  
鎮分領揚益及吉甫再入元衡亦還吉甫先一年以元  
衡生月卒元衡後一年以吉甫生月卒吉甫之數若符  
會焉先是長安謠曰打麥麥打三三三既而旋其袖曰  
舞了解者謂打麥者打麥時也麥打者謂暗中突擊  
也三三三謂六月三時也舞了解也元衡之卒也  
元衡卒劉禹錫作佳人怨二章云寶馬鳴珂踏曉塵魚  
文七首犯華茵滴來行哭里門外昨夜華堂歌舞人又  
云秉燭朝天遂不回路人彈止望高臺墻東便是傷心  
地夜夜秋螢飛去來



鄭網

奉和武相公省中宿齋酬李相公見寄云高閣安仁省  
名園廣武廬沐蘭朝太一種竹詠華胥禁靜踈鐘徹庭  
開爽韻虛洪鈞齊萬物縹帙整群書寒露滋新菊秋風  
落故藻同懷不同賞幽意竟何如

網字文明善屬文所交皆天下名士憲宗初拜相默默  
居位四年罷為太子賓客太和中以太子太傅致仕卒  
網守道寡欲所居不為烜赫事以篤實稱

網九月懷邵二詩云十歲此辰同醉友登高各處已三  
年又懷林十二云情人共惆悵良友不同遊其重友如  
此又有九月十五日東亭望月詩云紫閣道流今不見  
紅樓禪客早曾聞

獨孤良弼

上巳接清明遊宴詩云上巳歡初罷清明賞又追閏年  
侵舊曆令節併芳時暮雨鶯飛重春風酒醞遲尋花迷  
白雪看柳折清絲淑氣如相待天和意為誰吁嗟名未  
立空詠宴遊詩

良弼貞元間進士也為左司郎中又有良史者登進士  
第

獨孤綬



唐詩紀事卷三十三  
四  
投珠於泉詩云至道歸淳化明珠必棄捐天真未照乘  
成性却沉泉不是靈蛇吐非緣合浦還岸傍隨月落波  
底共星懸致遠終無脛懷貪遂息肩欲知恭儉德所寶  
在惟賢

德宗多召學術之士躬自考試又制科宣政殿如稱旨  
即翹足高吟編示宰臣曰此皆朕門生也獨孤綬所司  
試馴象賦及其本上上吟其句曰化之式孚則必受乎  
來獻物或違性斯用感於至仁上以綬爲知去就故特  
書第三先是代宗朝越人獻象三十有二上悉放之於  
山之南而綬不辱其受獻不傷其放棄故賞其知去就

焉

綬舉博學宏詞吏部考當乙科子邵覆之置甲科人咨  
其公

李李何

立春日曉望三素雲詩云靄靄青春曙飛仙駕五雲浮  
雲初縹緲承蓋下氤氳薄影隨風度殊容向日分羽毛  
紛共遠環珮杳猶聞靜合煙霞色遙將鸞鶴群年年瞻  
此節應許從元君

李何登貞元十一年進士第

李應



立春日曉望三素雲詩云玄鳥初來日靈仙望裏分冰  
容朝上界玉輦擁朝雲碧落流輕艷紅霓間采文帶煙  
時縹緲向斗更氤氳鬢隨風馭迢遙出曉零茲辰三  
見後希得從元君

應登貞元十一年進士第

盧拱

中元日觀法事云四孟逢秋序三元得氣中雲迎碧落  
步章奏玉皇宮壇滴槐花露香飄栢子風羽衣凌縹緲  
瑤轂輾虛空夕慕飡霞客常悲習蓼虫青囊如可授從  
此訪鴻濛

姚合送盧拱祕書遊魏詩云官閑身自在詩險語分明  
車馬應回晚煙花滿去程

楊巨源寄申州盧拱使君云領郡仍聞總虎貔致身還  
是見男兒小舡隔水催桃葉大鼓當雷舞柘枝酒坐微  
酣諸客例毬場慢撥幾人隨從來樂事憎詩苦莫放窓  
中遠岫知

元稹自唐歸京拱時爲祕書郎以詩贈樂天兼以遺稹  
稹和云新識蓬山傑深文翰苑材連投珠作貫獨和玉  
成堆劇敵徒相軋羸師亦自媒

李觀



字元賓以文馳聲貞元中卒於校書郎陸希聲序其文  
曰退之窮老不休終不能爲元賓之辭使元賓後退之  
死亦不能及退之之質退之大革流弊落落有老成風  
元賓則不古不今卓然自作一體激揚發越若絲竹中  
有金石聲每篇得意處如健馬在街蹀躞不能止其所  
長如此

觀贈馮宿云寒城上秦原遊子意飄飄黑雲載萬里獵  
火從中燒陰空蒸長煙殺氣獨不銷冰交石可裂風疾  
山如搖時無青松心願我獨不凋

宿裴友書齋云卧君山窻下山鳥與我言清風何颼颼

松栢中夜繁久遊失歸趣宿此似故園林煙橫近郊谿  
月落古原稚子不待曉花間出柴門

貞元八年宏詞試中和節詔賜公卿尺詩云淑節韶光  
媚皇明寵錫崇具寮頒玉尺成器幸良工豈止尋常用  
將傳度量同人何不取利物亦賴其功紫翰宣殊造丹  
誠厲匪躬奉之無失墜恩澤自天中

### 裴度

至日登樂遊園云陰律隨寒改陽和應節生祥雲觀魏  
闕瑞氣映秦城驗炭論時政書雲受歲盈影移長日至  
霧斂遠霄清景暖仙梅動風柔御柳傾那堪封得意空



對物華情

公出討淮西過女几山下刻石題詩後果尅期平賊其詩云待平賊壘報天子莫指仙山示武夫由是淮蔡底平民安生業白居易作詩二百言繼公篇之末何處畫功業何處題詩篇麒麟高閣上女几小山前爾後多少時四朝二十年賊骨化為土賊壘犁為田一從賊壘平陳蔡民晏然驟軍成牛戶鬼火變人煙生子已嫁娶種桑亦絲綿皆云公之德欲報無由緣公今在何處守都鎮三川舊宅留永樂新居開進賢今公在何官被衮珥貂蟬戰袍破猶在髀肉生欲圓

傍水閑行詩云閑餘何事覺身輕暫脫朝衣傍水行鷗鳥亦知人意靜故來相近不相驚

公赴敵淮西題名華嶽廟之闕門大順中戶部侍郎司空圖以一絕紀之曰嶽前大隊赴淮西從此中原息戰鞞石關莫教苔蘚上分明認取晉公題

公貞元中作鑄劍戟為農器賦其首云皇帝之嗣位三十載寰海鏡清方隅砥平驅域中盡歸力稽示天下不復用兵其後作相立殊勲致太平已見於文矣公題南庄云野人不識中書令喚作陶家與謝家樂天有詩云陶廬僻陋那堪比謝墅幽微不足攀何似嵩峯三十六



長隨申甫作家山

樂天求馬裴贈以馬因戲云君若有心求逸足我還留  
意在名姝引妾換馬之事樂天荅云安石風流無柰何  
欲將赤驥換青娥不辭便送東山去臨老何人與唱歌  
貞元八年公試宏詞有司以中和節詔賜公卿尺爲題  
公詩曰陽和行慶賜尺度及群公荷寵承佳節傾心立  
大中短長思合制遠近貴攸同共仰財成德將酬分寸  
功作程施有政垂範播無窮願續南山壽千春奉聖躬  
中書即事云有意効承平無功荅聖明灰心緣恐事霜  
鬢爲論兵道直身還在恩深命轉輕塩梅非擬議葵藿  
是平生白日長懸照蒼蠅謾發聲嵩陽舊田地終使謝  
歸耕

唐趙璘云晉公貞元中作鑄劍戟爲農器賦云觀其氣  
槩已有立殊勲致太平之意進士李爲作淚及輕薄暗  
小四賦李賀作樂府多屬意花草蜂蝶之間二子終不  
遠大文字之作可以定相命優劣矣

韋同則

仲月賞花云梅花似雪柳含煙南地風光臘月前把酒  
且湏拚却醉風流何必待歌筵  
同則建中時詩人也有韋同正者登建中四年第



陳蛻

蛻肅代間人賦長安十五詠自序云蛻生長江淮間以詩句從賦僅十餘年矣今我后撫運澤及四夷蛻復得為太平人其華清宮詩有夢裏換春秋之句

唐詩紀事卷第三十三

唐詩紀事卷第三十四

韓愈

張籍

史延

丁澤

樊宗師

李道昌

韓愈

司空圖云金之精麤攷其聲皆可辨也豈清於磬而渾於鍾哉然則作者為文為詩才格亦可見豈當善於彼不善於此耶愚觀文人之為詩詩人之為文始皆繫其所尚所尚既專則搜研愈至故能銜其功於不朽亦猶力巨而闢者所持之器各異而皆能濟勝以為勅敵也愚嘗覽韓吏部歌詩累百首其驅駕氣勢若掀雷挾電



撐挾於天地之垠物狀其變不得鼓舞而徇其呼吸也  
其次皇甫祠部文集外所作亦爲道逸非無意於深密  
蓋或未遑耳今於華下方得柳詩味其探搜之致亦深  
遠矣俾其窮而克壽抗精極意則固非瑣瑣者輕可擬  
議其優劣又嘗觀杜子美祭太尉房公文李太白佛寺  
碑贊宏拔清厲乃其歌詩也張曲江五言沈鬱亦其文  
筆也豈相傷哉噫後之學者褊淺片詞隻句未能自辨  
已側目相詆訾矣痛哉因題柳集之末庶俾後之詮評  
者罔惑偏說以蓋其全云

洛邑得休告華山窮絕陁倚巖睨海浪引袖拂天星目  
容崢嶸詭狀輪囷疑伏龍怪鎮含煙雲又有古木倒倚  
絕壁盤根網結掛絡空碧崩崖傍傾瑋逕下仄羽人幽  
會此馬瑤席搏翠壁而直上輒崎嶇於紫氛雙巖屹以  
中斷奔屏感而成室涵孕精爽澄凝氣源信列仙之攸  
居豈塵俗之所止哉嗚呼鶴駕一去鳳簫響絕荆榛蔽  
路危磴敗城跡留入境而舉世莫知地聯精刹而群遊  
莫至吁可怪乎其晦藏也元和丙申歲秋八月余以膠  
鬲之困寓居精舍再從兄昭肅時假茲邑政便於人務  
簡多暇與當寺僧知捷日探道源捷亦好古饗奇之士  
也因語故實緬思羽客之玄風以爲靈跡神蹤精誠必



復乃操刃持畚履險道幽梯絕棧而歷巉巖排蒙籠而  
登杳藹時更一稔而神居秘躅粲然皆睹嗟乎芝田玄  
圃豈遠乎哉天之與人氣通則合客有顧咨而諗予者  
或應之曰天之運否泰相濟故善利稱德下民昏墊人  
之道行藏有數故棘津逢累時惟鷹揚靈物必通道在  
斯著不然何荒阻千祀勃馬而興歟乃為銘曰鑿石通  
道兮援木枝仰攀洞口兮踐歎危奔龍伏虎兮勢狀竒  
林攢峯倚兮蟠雲螭下臨陰谷兮神以慄嵌巖石兮洞  
無極老松蕭瑟兮生遠風興雲霏兮雨煙霧黑懸巖排空  
兮色噴黛堅根網絡兮層霄外披霓解帶兮羽翼生下

疏陳治事廷議不隨為非常惋佛老法漬聖人隄乃倡  
而築之及為刑部侍郎遂章言憲宗迎佛骨非是任為  
身耻上怒天子先生處之安然就貶八千里海上嗚呼  
古所謂非苟知之亦允蹈之者耶吳元濟反吏兵久遁  
無功國涸將疑眾懼恟恟先生以右庶子兼御史中丞  
行軍司馬宰相軍出潼關請先乘遽至汴感說都統師  
乘遂和卒擒元濟王廷湊反圍牛元翼於深救兵十萬  
望不敢前詔擇廷臣往諭眾慄縮先生勇先元稹言於  
上曰韓愈可惜穆宗悔馳詔無徑入先生曰止君之仁  
死臣之義遂至賊營麾其眾責之賊惶汗伏地乃出元



翼春秋美臧孫辰告糴于齊以爲急病校其難易孰爲  
宜褒嗚呼先生真古所謂大臣者耶遷拜京兆尹斂禁  
軍帖旱糴醫倖臣之銜再爲吏部侍郎薨年五十七贈  
禮部尚書先生與人洞朗軒闕不施戟級族姻友舊不  
自立者必待我然後衣食嫁娶喪葬平居雖寢食未嘗  
去書怠以爲枕食以飴口講評孜孜以磨諸生恐不完  
美游以詼笑嘯歌使皆醉義志歸嗚呼可謂樂易君子  
鉅人者矣夫人高平郡君范陽盧氏孤前進士昶婿左  
拾遺李漢婿集賢校理樊宗懿次女許嫁陳氏三女未  
笄銘曰維天有道在我先生萬頸脊延坐廟以行令鑿

絕耶痾此四方惟聖有文非違歲于先生起之焯後于  
前曠義滂仁耿照克天有如先生而合亘年按我章書  
經紀大環嗟不時施昌極後昆噫嘻永歸知心之悲瓊

憂反嗟  
其禁反

喚起窻全曙催歸日未西無心花裏鳥更與盡情啼乃  
二禽名也喚起聲如絡緯圓轉清亮偏鳴於春晚江南  
謂之春喚催歸子規也

謹按公生於代宗大曆三年戊申

德宗貞元八年壬申是歲公登第二十五

十一年乙亥上宰相三書

時趙璟賈耽盧邁為相是歲  
欲相延齡陽城諫也



五月東歸作感二鳥賦其末云辛年歲之未暮庶無羨於斯類時二十八

十三年丁丑從董晉辟為汴宋穎毫觀察推官

十五年己卯二月晉公薨公隨喪歸既出四日宣武軍亂殺行軍司馬陸長源公作汴州亂二章云汴州城門朝不開天狗墮地聲如雷健兒爭誘殺留後連屋累棟燒成灰諸侯咫尺不能救孤士何者自興哀又曰母從子走者為誰大夫夫人留後兒長源也昨日乘車騎大馬坐者為趨乘者下廟堂不肯用干戈嗚呼柰汝母子何十六年庚辰依徐州武寧軍節度張建封

十九年癸未拜監察御史上書論宮市貶連州陽山令時有送浮屠文暢孟東野序

二十年甲申移江陵法曹參軍途中作詩贈三翰林未幾以四門博士召

二十一年乙酉正月德宗崩順宗立改元永貞韋執誼王叔文等用事又謀奪中宮兵制天下之命是年八月皇太子即位帝自稱太上皇上貶執誼叔文等公作永貞行云君不見太皇諒陰未出命小人乘時偷國柄此軍百萬虎與龍天子自將非他師一朝奪印付私黨凜凜朝士何能為狐鳴梟噪爭署置睽閃跳跟相嫉媚夜



詐詔書朝拜官超資越序曾無難公然白日受賄賂火  
齊磊落堆金盤元臣故老不敢語晝卧涕泣何汎瀾董  
賢三公誰復惜侯景九錫行可歎國家功高德且厚天  
位未許庸夫干嗣皇卓犖信英主文如太宗武高祖膺  
圖受禪登明堂共流幽州鮫死羽四門肅穆賢俊登數  
君匪親豈其朋郎官清要為世稱荒郡迫野嗟可矜湖  
波連天日相騰蠻俗生梗瘴癘蒸江氛嶺侵昏若疑一  
蛇兩頭見未曾怪鳥爭鳴令人憎蠱虫群飛夜撲燈雄  
虺毒螫墜肢肱食中置藥肝心崩左右使令詐難憑慎  
勿浪信當兢兢吾常同僚情可勝具書目見非妄徵嗟

爾既往宜為懲是歲又作五箴

十年三八

憲宗元和元年丙戌權知國子博士作釋言

二年丁亥是歲作元和聖德詩

三年分司東都始宰相鄭公索公文公獻之有譖公者

遂作釋言至是不自安乃求分司

四年是歲真為國子博士改分司都官員外郎

五年為河南令是歲效玉川子月蝕詩

六年入拜職方員外郎時有送窮文寄盧仝詩坐論華

陰令柳澗事復為博士作進學解執政竒其才改比部

郎中史館修撰轉考功郎中修撰如故數月以考功知



制誥論討蔡事與裴度議合月滿遷中書舍人賜緋魚  
袋後卒以謗語改太子右庶子自十六年至十一年也

十二年丁酉裴度宣慰淮西奏公行軍司馬有從軍洎  
途中諸篇其間次潼關寄張十二使君詩云荆山已去  
華山來日照潼關四扇開刺史莫辭迎候遠相公新破  
蔡州迴又次潼關上都統相公云暫辭堂印執兵權盡  
管諸軍破賊年冠蓋相望催入相待將功德格皇天又  
桃林夜賀晉公云西來騎火照山紅夜宿桃林臘月中  
手把命珪無相印一時重疊賞元功數篇皆有與旨元  
濟平遷刑部侍郎

十四年正月表乞燒棄佛骨疏入貶潮州刺史有次藍  
關示姪孫湘詩云一封朝奏九重天夕貶潮陽路八千  
欲為聖明除弊事豈將衰朽計殘年雲橫秦嶺家何在  
雪擁藍關馬不前知汝遠來應有意好收吾骨瘴江邊  
是歲十月量移袁州刺史酬張韶州詩云明時遠逐事  
何如遇赦移官罪未除北望詎令隨塞鴈南遷纔免葬  
江魚將經貴郡煩留客先惠高文謝起予暫欲繫舡韶  
石下上賓盧舜整冠裾又留別張使君云來往再逢梅  
柳新別離一醉綺羅春久欽江揔文才妙自歎虞翻骨  
相也鳴笳急吹催落日清歌緩送感行人已知奏課當



徵拜那復淹留詠白蘋

十五年庚子至袁州是歲正月憲宗崩穆宗召爲國子祭酒長慶元年辛丑轉兵部侍郎七月成德軍大將王廷湊殺田弘正

二年公奉命宣撫鎮州爲幽鎮招撫使公有行次承天營酬裴公詩云竄逐三年海上歸逢公復此著征衣旋吟佳句還鞭馬恨不身先去鳥飛是歲二月廷湊解涿州之圍牛元翼歸京師六月裴度罷李逢吉爲相始公有和裴公感恩言志詩云文武功成後居爲百辟師林園窮勝事鐘鼓樂清時擺落遺高論雕鐫出小詩白紙

無不可范蠡爾其誰又和裴公朝回見寄云盡瘁年將久公今始暫閑事隨憂共減詩與酒俱還放意機衡外收身矢石間秋臺風日迥正好看前山時牛李黨熾裴介其間累遭謗讟故公詩有高蹈之語是歲拜京兆尹三年罷京兆尹爲兵部侍郎尋拜吏部侍郎四年甲辰有南溪始泛詩是歲公以病罷吏侍故有餘年諒無幾休日愴已晚自是病使然非由取高塞又有足弱不能步自宜收朝蹟之句十二月二十卒於靖安里年五十七

張籍



短歌行云青天蕩蕩高且虛上有白日無根株流光暫  
出還入地使我年少不須臾與君相逢勿寂寞衰老不  
復如今樂玉卮盛酒置君前再拜願君千萬年

節婦吟寄東平李司空云君知妾有大贈妾雙明珠感  
君纏綿意繫在紅羅襦妾家高樓連苑起良人執戟明  
光裏知君用心如日月事夫誓擬同生死還君明珠雙  
淚垂何不相逢未嫁時

白紵歌云皎皎白紵白且鮮將作春衣稱少年裁縫長  
短不能定自持刀尺向姑前復恐蘭膏污纖指常遣傍  
人收墮珥衣裳著時寒食下還把玉鞭鞭白馬

將軍行云彈箏峽東有胡塵天子擇日拜將軍蓬萊殿  
前賜六纛還領禁兵爲部曲當朝受詔不辭家夜向  
陽原上宿戰車彭彭旌旗動三十六軍聲上隴隴頭戰  
勝夜亦行分兵處處收舊城胡兒殺盡陰磧暮擾擾唯  
有牛羊聲邊人親戚曾戰歿今逐官軍收舊骨磧西行  
見萬里空樂府獨奏將軍功

白頭吟云請君膝上琴彈我白頭吟憶昔君前嬌笑語  
兩情宛轉如縈素宮中爲我起高樓更開花池種芳樹  
春天百草秋始衰棄我不待白頭時羅襦玉珥色未暗  
今朝已道不相宜揚州青銅作明鏡暗中持照不見影



人心迴互自無窮眼前好惡那能定君恩已去若再返  
菖蒲花青月長滿

籍樂府詞清麗深婉五言律詩亦平澹可喜七言詩則  
質多文少人才各自有宜不可強文飾也

文昌有謝裴司空馬詩云乍離華廐移蹄澁初到貧家  
舉眼驚此馬乃是一遲鈍不能行而多驚詩人之微而  
顯亦少其比

寒食內宴云朝光瑞氣滿宮樓綵繡魚龍四面稠廊下  
御厨分冷食殿前香騎逐飛毬千官盡醉猶教坐百戲  
皆呈未放休共喜拜恩侵夜出金吾不敢問行由

籍宿江上詩云楚驛南渡口夜深來客稀月明見潮上  
江靜覺鷗飛旅次今已遠此行殊未歸離家久無信又  
聽搗寒衣或云劉長卿餘干旅舍云搖落暮天迥丹楓  
霜葉稀孤城向水閉獨鳥背人飛渡口月初上隣家漁  
未歸鄉心正欲絕何處搗征衣槩相類也

籍字文昌和州人歷水部外郎終主客郎中  
籍荅鄱陽客云江臯歲暮相逢地黃葉霜前半夏枝子  
夜吟詩向松桂心中萬事喜君知乃知藥名詩自元和  
間已爲之矣

蕃漢斷消息死生長別離句長於送人處憶得別家時



句流光暫出還入地使我年少不須臾句採樵莫採松  
與栢松栢生枝堅且直與爾作屋成家宅句右張爲取  
作主客圖

退之送東野序云唐有天下陳子昂蘇源明元結李白  
杜甫李觀皆以其所能鳴其存而在下者孟郊東野始  
以其詩鳴其高出晉魏不懈而及於古其他浸淫乎漢  
氏矣從吾遊者李翱張籍其尤也三子者之鳴信善矣  
抑不知天將和其聲使鳴國家之盛邪抑將窮餓其身  
思愁其心腸而使自鳴其不幸耶三子者之命則存乎  
天矣其在上也奚以喜其在下也奚以悲

籍詩善叙事如拜豐陵云歲朝園寢遣公卿學省班中  
亦攝行身逐陵官齊再拜手持木鐸叩三聲寒更報點  
來山殿曉炬分行照栢城却下龍門看漸遠金峯高處  
日初晴

送令狐尚書東都留守云朝廷重寄在關東共說從前  
選上公勲業新成大梁鎮恩榮便守洛陽宮行香鑿出  
天橋上巡禮常過禁殿中每領群官拜章表半開門仗  
日曈曈

田司空入朝云西來將相望兼雄不與諸軍覲禮同早  
變山東知順命新收濟上立殊功朝官叙謁趨門外恩



使宣迎滿路中間闔曉開銅漏盡身當受冊大明宮

送汀洲元使君云曾成趙北歸朝計因拜王門最好官

為郡整辭雙鳳闕全家遠過九龍灘山鄉只有輸蕉戶

水鎮應多養鴨欄地僻尋常來客少刺桐花發共誰看

送李僕射愬赴鎮鳳翔云由來勲業屬英雄兄弟連榮

列位同先入賊城擒惡首盡封筦庫讓元公旌幢獨繼

家聲外竹帛新添國史中天子欲收秦隴地故教移鎮

古扶風

送裴相公鎮太原云盛德雄名遠近知功高先乞守藩

維銜恩暫遣分龍節署勅還同在鳳池天子親臨樓上

送朝官齊出道邊辭明年塞北諸蕃落應起生祠請立

碑

白樂天讀籍詩集云張公何為者業文三十春尤攻樂

府詞舉代少其倫姚合讀籍詩有詩云妙絕江南曲淒

涼怨女詩古風無敵手新語是人知

史延

清明賜新火云上苑連侯第清明及暮春九天初改火

萬井屬良辰頒賜恩踰洽承時慶亦均翠煙和柳嫩紅

燭出花新寵命尊三老祥光燭萬人太平當此日空復

荷陶鈞



唐詩紀事卷五  
大曆九年留守蔣渙試進士於東都延登第

丁澤

龜負圖詩云天意將垂象神龜出負圖五方行有配八  
卦義寧孤作瑞旌君德披文叶帝謨乘流新得路逢聖  
喜存軀蓮葉池通泛桃花水自浮還尋九江去安肯曳  
泥塗

澤大曆十年試龜負圖詩爲東都第一

樊宗師

蜀綿州越王樓詩序云綿之城帝獨擻掀明威瀾石硝  
馳涪瀨左陵凌紅袂簪天地送行癸壬且掬跼踴于西

北蟠紅顏青越王正故爲樓重軒疊飛門窻蒙傘寒寒  
予始登謂日明昏曉可窺其背雷電合風雲遇霜辛露  
酸星辰介行鬼神變化草木顯繡髻銜萊芙蓉皆可察極  
既索視其江帶又極視其土崗斷暴遠近山嶮嶮若闕  
之東皇天原開見荆山我其黃河澗然爲曲直淚雨落  
不可掩因口其心曰無害若其自果星星過歸尚悲不  
能解重爲詩以釋益不可顧謂郡中諸君能無有意綴  
以華艷其念蓄云

危樓倚天門如闡星辰宮棖題薄龍怪洄洄繞雷風徂  
秋試登臨大靄也喬空不見西北路考懷益雕窮石瀨



薄濺濺土山杳穹宮昔人則爲遊所適配顏紅今裁茲  
之來猶校成歲功輟田植科畝逝圃歌芳叢地財無取  
厚人室安取豐既乏富庶能千萬慙文翁  
宗師字紹述襄陽節度使澤之子韓退之誌其墓曰爲  
文必出於己不襲蹈前人一言一句何其難也必出於  
仁義其富若生畜萬物必具海涵地負放恣縱橫無所  
統紀然而不煩於繩削而自合也嗚呼紹述於斯術其  
可謂至於斯極者矣

李道昌

道昌唐大曆十三年爲蘇州觀察使一日郡城外虎丘

山有鬼題詩二首隱於石壁之上云青松多悲風蕭蕭  
聲且哀南山接幽壠幽壠空崔嵬白日徒昭昭不照長  
夜臺雖知生者樂魂魄安能迴况復念所親慟哭心肝  
摧慟哭更何言哀哉復哀哉又曰神仙不可學形化空  
遊魂白日非我朝青松爲我門雖云隔幽顯猶如念子  
孫何以遺悲惋萬物歸其根寄語世上人莫厭臨芳罇  
莊生問枯骨王樂成虛言道昌異其事遂具奏聞唯勅  
令致祭道昌爲之文曰嗚呼萬古丘陵化無再出君若  
何人能開詩筆何代而亡誰人子姪曾作何官是誰仙  
室寂寞夜臺悲乎白日不向紙上石中隱出桃源三月



深草垂楊黃鶯百轉猿聲斷腸不題姓字寧辨賢良嗚呼哀哉嘆昔先賢空傳經史終無再還青松嶺上嵯峨碧山大唐正業已記詩言痛復痛兮何處賓悲復悲兮萬古墳能作詩兮動天地聲悲怨兮淚霑巾感我皇兮列清酌願當生兮事明君是時祭後經數日再有詩一絕于石云幽冥雖異路平昔忝攻文欲知潛昧處山北兩孤墳於寺後山之地果有一墳極高大荆榛藜茂詢諸耆艾竟不知何姓氏至今猶存皮日休和云念爾風雅魂幽咽猶能文空令傷魂鳥啼破山邊墳陸龜蒙和云靈氣猶不死尚能成綺文如何孤窆裏猶

自讀三墳

唐詩紀事卷第三十四



原言卷之三

三



